

C. VALERI FLACCI

teque ducem. tales, tales ego ducere suetus  
atque sequi. nunc ille dies (det Iuppiter oro),  
345 ille super quo te Scythici regisque marisque  
victorem atque umeros ardentem vellere raptō  
accipiam cedantque tuae mea facta iuventae.  
sic ait. ille suo conlapsam pectore matrem  
sustinuit magnaue senem cervice recepit.  
350 Et iam finis erat. Zephyrumque ratemque morantes  
solverat amplexus tristi tuba tertia signo.  
dant remo sua quisque viri, dant nomina transtris.  
hinc laevum Telamon pelagus tenet, altior inde  
occupat Alcides aliud mare, cetera pubes  
355 dividitur. celer Asterion, quem matre cadentem  
Peresius gemino fovit pater amne Cometes,  
segnior Apidani vires ubi sentit Enipeus,

\* \* \* \* \*

nititur hinc Talaus fratrisque Leodocus urget  
remo terga sui, quos nobile contulit Argos.  
360 hinc quoque missus adest quamvis arcentibus Idmon  
alitibus; sed turpe viro timuisse futura.  
hic et Naubolides tortas consurgit in undas  
Iphitus, hic patrium frangit Neptunius aequor  
qui tenet undisonam Psamathen semperque patentem  
365 Taenaron Euphemus, mollique a litore Pellae  
Deucalion certus iaculis et cominus ense  
nobilis Amphion, pariter quos edidit Hypso  
nec potuit similes voluitve ediscere vultus.  
tum valida Clymenus percusso pectore tonsa  
370 frater et Iphiclus puppem trahit, et face saeva